



四溟山人全集卷之六

東郡 謝榛 著

東郡 蘇潢

全校

赤城 陳養才

東郡新安 張季彦 程非相 全關 詳校

五言律詩一百二十首

薄暮趙戶部良弼官署西園同鄭山人中伯

醉賦五首

薄暮偶乘興開樽非預期野夫偏坐久庭雀故飛遲
地拔群松勁天成片石竒種蔬甘此味還使後人知

二
官况殊瀟灑深居誰見真交游存古意奴隸敬詩人
陰合松亭爽花垂瓠架新遲留共明月相對幾綸巾

三

要識爲農苦官園半畝禾有才知計遠無事閱書多
童子琴樽待山人杖屨過長吟見幽意獨鳥下庭柯

四

園中有亭沼宦邸得幽棲曲折由人勝深沉使客迷
竹枝風外裊蓮葉雨中低我欲盡竒絕明朝還杖藜

五

騷雅成幽賞相依古樹叢未論金谷勝真與漆園同
宦迹風雲轉時擢郎中王程關塞通隨君秋夜夢乘

月過遼東

讀林僉憲邦陽詩作此寄懷

遙憶石洲子金聲久不聞天連百越樹人隔萬山雲
刻意能驚代冥心苦到君清秋若共賦風月兩平分
答楊明府安見示新作

志節同陶令君何踈酒卮老無身外計坐有興中詩
劔匣閉星斗書樓閒歲時朝來嘆衰白霜滿菊花枝
暮秋集小山王孫第分得新字

悲秋仍菟苑華髮幾莖新黃菊頻催老青山久待人
交情且樽俎世事各風塵醉別王孫去天涯草自春
送范中丞堯卿鎮贛州四首

相見春鷺合相違秋葉踈河橋通去路雲樹隔行車
上策蒼生定中丞白髮初曾勞萬里念寄我日南書

二

朔鴈催行色江天入望遙旌飛秋草岸船壓夕陽潮
有賦思梁宴虚心聽楚謠霜威及嶺外千里瘴煙消

三

九月虔州去天南宿霧開揚帆生遠思秉鉞見雄才

地轉三吳盡山連百粵迴夜深瞻北斗獨上鬱孤臺

四

重鎮行期迫孤懷驛道賒我還漳水曲君向楚天涯
聚散今多感風騷舊一家遙知大庾嶺相憶有梅花

廩延謝夏楚愚明府載酒過訪

夏爲楚
監利人

道院停鳧鳥飛觴邂逅中知心千里合促膝幾宵同
白髮燕歌短清秋楚賦雄槐庭初下葉別思向西風

答錫山華明伯寄詩中及盧枏事二首

有客緘書至新詩更一看氣回吳調別骨變楚騷寒
河嶽嗟吾老江城見爾難三茅舊時洞誰與話還丹

二

久客了心事慙君獨許多力當排難久眼見惜才多
失意逢鸚鵡全生返薜蘿騷人近彫謝江海送悲歌

酬李伯華見寄新製樂府

誰是風騷侶今聞李太常賞音無遠近作者見行藏
齊瑟正聲轉燕歌悲調長秋來桐葉下千里動清商

題山水圖二首

川原人不到盡日草亭閒秋晚樹搖落天高雲往還
沙邊多白鳥湖上一青山榜子復何處暝投紅蓼灣

二

石樹重陰合郊亭遠色分泉飛半空雨江落數峰雲
幽興自深坐長歌誰更聞申生今白首無意待玄纁

寄南都毛明府正之

又宰南都邑烏臺空薦書詎知人事巧翻使宦情踈
梅雪清相映山雲澹目如大江春水發應有北來魚

洛陽懷古

百戰龍蛇定中原舊帝居卬山誰酌酒落日自停車
漢室浮雲過周京亂草餘卽今蘇季子祗合老田廬

謝給事仲川幽居

歸來見華髮章疏幾勞思白鳥共風雨滄洲虛歲時

一琴童子伴數畝稻花垂聖代堪高枕何煩學楚詞

贈瞽僧

禪牀閒白日坐覺雨花深談法元無象觀空只在心
鉢盂知舊物鐘磬會餘音尚記西方路恒河自可尋
宿少林寺同莫陳二秀才

蘿逕通深處蒼然峭壁重吟成太室雨坐久少林鐘
習靜聊今夜探竒復幾峰還期共禪榻莫負歲寒松

達磨洞

長江折蘆後面壁此高岑祇樹抱巖古法雲垂洞深
石存一片影天印萬年心徒使登攀客松風聽梵音

張德徵汴中見訪僕已過杞兩不相值

相尋非預期乘興我何遲兩地琴樽夜同懷風雨時
苦吟燈自對良晤夢先知好共碧筒飲荷花香滿池

答沈禹文見寄

未息吳中戰寧聞燕市歌一官身事重長夜國憂多
古道淹騏驎秋山老薜蘿趨朝成百感風色動鳴珂

送吳逸人汝震歸甬東

有客嘆無魚河亭送別初馬歸梁苑路兵阻越鄉書
野岸滄波轉霜天赤葉踈世情堪一醉還定海門居

靜公園借居

欲覽匡廬勝衰年惜未能栖遲無俗侶幽寂共隣僧
禪定階前石心空夜半燈浮圖著靈異昨上最高層
鄒子序過鄴因談吳門之亂偶贈

家在兵戈裏還成相見期死生多難過骨肉異鄉悲
山照吳門火城翻漢將旗苦懷殊不盡仍送渡江詩
維揚兵後寄張僉憲士直

羽書飛不絕東望海天遙旗雜廣陵樹兵喧揚子潮
材官曾幾戰壯士莫輕招獨立多悲感江城颯晚颺
寄豫章周子乾

解官君獨早南北募兵年烽火端居外雲霞高枕邊

放歌行野寺垂釣坐江船剩有閒遊地開池種白蓮

寄陸太守子部

目極九江水誰傳雙鯉魚城當吳楚地天逼斗牛區
懷古雲西駐求賢榻左虛郡齋梅正發歲晚意何如
送黃隱君南歸

黃生久不見一見卽言歸落葉世情薄浮雲生事微
潮聲隨晚櫂江色照寒衣還醉莆中酒春風自掩扉
酬王郡丞明輔見寄

相逢胡馬後南北重予哀鴈逐邊聲起鯨翻海色來
朝端收衆議河朔滯君才安得同樽酒長歌魏武臺

送姚景芳應辟北上

道氣由來重心期兩不違君應虛榻久我自造門稀
去路多秋草離觴共夕暉此行由故國悵望不同歸
寄懷張山人徵伯

爲客感浮萍桑田隔洞庭梁園頻有賦楚醴獨能醒
望裏暮雲白病餘春草青張衡愁已過歸計報山靈
哀江南八首

爲說江南勝豪華異往年波濤揚子夕風雨秣陵天
歲苦兵間賦春荒戰後田都門遲飛輓何處泊吳船

二

昆明未習戰南伐轉憂深兵氣連瓜步人煙斷柘林
吳姬窮海淚燕將故關心何日鏡歌轉蒼生望捷音

三

戰馬嘶江上寒生楓樹村新兵五都盡舊業幾家存
共倚中朝盛誰將上策論梁鴻避世者寧復老吳門

四

召募今南討中原羽檄過幾年紆策定一戰賞功多
霧變青山色天橫滄海波飄零國士老長望一悲歌

五

華亭未奏捷烽火更西湖海艦賊來去天兵功有無

人心多爲漢國計竟全吳野哭徵求盡蒼茫寒月孤

六

古來兵不到湖裏洞庭山日慘干戈際雲愁猿鳥間
少年應習武幽士且栖閒縱熟黃柑酒誰能長醉顏

七

江山天設險滿目戰圖秋東海兵停權西風客倚樓
朝廷存大體斧鉞繫深憂不信征南將功成早白頭

八

氛祲頻年動東南盡處看海搖千艦出兵犯七閩寒
殺伐寧無定憑陵信有端遙聞日本使猶自貢長安

寄江少卿端甫張郎中伯啓同謫廬州

二君懷落落南謫况同時多事殊相感全恩久自知
身違光祿酒興在水曹詩杜若巢湖上深含白露滋

過故居有感二首

予故宅久屬王氏

舊業成睽遠親朋久失群百年生長地一片往來雲
獨立空流水長吟但落曛結茅何日定西隴事耕耘

三

飄零三十春下馬問比隣相見弟兄老堪嗟門巷新
行蹤猶泛梗世故一浮塵王謝豪華地殊非舊主人
贈別史郎中應之還張秋二首

一見遽言別其如南北情君今何水部吾豈謝宣城
帆影樹中出河流天際平誰無感懷賦兩地共秋聲

二

安平爾去道官署在河潯一水風煙色三秋魚鳥心
才高君柱石計拙我山林應念離居者蟲鳴蔓草深
謝劉監察質卿見寄

清霜肅海岱春到野夫邊驄馬勞今日蒼生望有年
舊交仍杖屨遐思各雲天爲問齊中俗何人似魯連
送徐別駕載卿之京

卿家本喬木却繫一官憂薏苡何人辨功名不自謀

搖鞭霜滿路倚劔月當秋薄俗應懷刺長安問五侯

九日方晦叔同登北城樓兼示真上人二首

相期賦九日倚堞興何饒天若來風雨人應感寂寥
長河明遠色寒柳爭踈條更愛東林勝談禪坐此宵
二

登高有惠遠攬勝卽廬山幽事知誰重浮生得此閒
乾坤惟舊侶霜露各衰顏莫待黃花老明朝更一攀

重九夜吳希實隱君館陪餞君搢詩人二首

開樽當節序歸思莫匆匆秋色猶南菊寒聲自北鴻
幾人心迹定萬事古今同曠達真吾輩何如栗里翁

一
柴萸共把翫聚散復何愁秉燭重陽過移樽片月留
我拚同調侶君醉異鄉秋別後多詩興還登何處樓
酬翁子書見示新作

病餘秋思動對月幾吳吟江上多萼菜山中有橘林
感因爲客久情豈在交深安得共耕鑿相期松栢心
暮秋柬徐別駕載卿

南征秋轉劇不寐夜漫漫白髮艱虞盡滄洲去住難
旌旗連野暗兵甲照江寒選將須史事誰能議築壇
寄塞上路監察子中

沙漠動霜威巡行久未歸眼中求將畧意外得邊機
日落馬南顧天寒鷗北飛莫令諸俠少爭獵向金微
讀江寧王悼內子詩

淒涼不易寫楚調復清新字字心間淚時時夢裏人
風悲西苑樹月慘後宮春今與陳王並無慙賦洛神
示兒元煒元燭

汝曹年漸長衣食竟何謀世事身多懶吾生老更愁
江湖征鴈夕南北戰雲秋欲效龐公隱青山何處求
留別接上人

相逢正秋雨春雪復來時信宿能分榻虛懷且愛詩

曇雲寧有色祗樹豈多枝別路聞鐘磬斜陽去馬遲
暮秋聞倭寇稍平寄上南都大宗伯孫公兼
懷太史文和二首

纔罷江南戰憑高動越吟濤聲翻日暮兵氣結秋陰
聽履青天遠含香紫霧深世傳修漢史誰識二班心

二

省中霜葉下百感向斜暉北餉多留滯南征幾是非
寸丹經國遠尺素到家稀共擬孫弘閣無勞說布衣
才子中歸自荆楚具陳苦懷賦此以贈

柳花三十度嗟爾尚飄然愁卧湘江雨行吟楚塞天

飢寒身不定兒女意長懸自喜殘裘在猶堪當酒錢
老懷

殘年百事過閱世復何言多病仍春草全家豈故園
送絲風不定亂雀日相喧我欲從丹侶青山靜掩關
送許殿卿守建寧

移官君獨遠惆悵撤離筵山轉荆南路江浮蜀外天
自能臨異俗幾爲問荒田到日梅花發春生五馬前
贈盧次楨三首

五年君一到未是曳裾頻曉發黎陽騎宵探漳浦春
交游魏公子懷抱楚騷人好覓滄洲侶相將采綠蘋

誰識豐城劍，天空紫氣高。老來悲道路，醉後益風騷。
物議水霜過，才名歲月勞。一寒今范叔，誰復贈綈袍。

三

五十君多感艱危，不可忘。自知兄弟少，寧爲鶴鷄傷。
漢黨無文字，燕歌獨醉狂。莫違湖海興，徒自老黎陽。

哭弟松四首

多病吾仍在，沉酣爾遽休。相依堪共老，永別杳難求。
伏臘還新酒，風煙豈故丘。漳河暮轉急，嗚咽正東流。

二

吾弟忽長往，孤魂應向東。在家憂患過，爲客去留同。
白日身何懶，清樽老不空。至今城北路，隴樹起悲風。

三

汝兄今欲老，汝姪已成行。春草空經眼，秋風益斷腸。
敝裘餘蟣虱，孤館但蛩螿。夢裏論歸計，寧知隔杳茫。

四

涕淚灑連枝，冥冥長別離。可憐生事盡，無那旅魂悲。
古木風鳴夜，寒城月落時。天教汝不死，同有故鄉期。

寄懷徐以言

東山在上虞縣西
南謝安舊遊於此

罷官還舊業，應起著書樓。海鶴當庭下，溪雲拂檻流。

獨醒風雨夜高臥甲兵秋况有東山勝堪追謝傳遊

寄李僉憲師孟

楚客限王程春風遊宦情山連吳地闊天與浙江平
烽燧勞東望干戈甚北征莫教終孺子獨為請長纓

劉侍御叔清擢守扶風賦此寄贈

旌節發河陽君行西路長心懸隴上月威帶日南霜
入郡春隨馬談兵秋滿堂于今汲長孺易使鬢毛蒼

寄谷憲副子聲時撤兵歸上黨

太行不改色百代有功名秋氣高燕塞霜威肅晉兵
旌旗還舊鎮歌頌起巖城藍水西來急知君一寄聲

寄潞州栗道夫兼訊迺兄仁夫

清霜驅朔鴈人在夕陽西風土蒼山隔煙蘿白日迷
文章歸逸調伯仲得幽棲看竹延鄰叟門前有杖藜

憶洞庭湖東滌推官

君家洞庭上靈秀見君才湖裏青山出城頭白浪回
湘娥還倚竹楚客漫登臺為說巴陵勝西南雲霧來

王元美鎮青州賦此寄懷

當年客燕市官舍每經過促膝寒燈盡論心夜雨多
別來成老病愁裏問兵戈北海開樽日何人共醉歌

懷李仲學罷官還北海

江南疲戰伐封事更誰論霜入多愁鬢天餘不死恩
教兒書滿案謝客草侵門非復獨醒日何妨開綠樽

寄贈胡懋誠

少司馬文

家住寧陵郭知君英妙年歲寒沽濁酒雪霽獵荒田
才豈青雲展名須白首全不聞晉嵇紹心事至今憐
陳道義自北都歸母喪時滯清源

慈顏成夢杳歸櫬滯年深此日淒涼色何人慷慨心
愁雲低大路落葉響疎林不見郭元振中原空獨吟

寄懷吳少呂兼訊許克之李于鱗殷正夫三
詩丈

近作齊城客清樽誰爲開寒聲急夜杵月色澹秋臺
自曠吳中侶今從海右才阿蒙應刮目寧遣遽歸來

送吳克誠歸南海

孤擢乘秋發歸期老杜蘅煙波同客計風格自儒生
豈負漁樵侶遙含桑梓情海南天欲盡家在五羊城
寄周郡丞準卿時吳中水患有感

不盡江湖感君仍佐一州驚波蕩白日積雨入清秋
地倍吳杭價天加漢闕憂誰同此懷抱北望獨登樓
秋日柬方晦叔

端居何思遠名士亦心勞巨筆凌班史秋懷得楚騷

起所王堂
四海金集卷六
西
窓虛清桂露庭迥急松濤詩草人爭寫三齊紙價高
鄭徵君中伯見過

古來踈曠者隨意百年中白首賦逾健黃金囊易空
有家惟北鴈何樹不西風相見無朝暮幽懷謝客同
寓居禪院申明府幼川携酒過夜

禪扉夜尚開何意冒寒來好客無餘俸爲官不盡才
水花明古樹燭影動春杯落盡孤城月乘酣車馬回
贈包明府起春

青雲南國彥百里試才初賦稅多憂色聲名一薦書
訟庭春雪滿官舍古槐踈深夜無人見鳴琴窓月虛

吳人鄭速季入鄴省兄中伯每談倭寇之亂
久而思歸賦此以贈三首

驅馬來河朔雲愁故國賒干戈身是贅道路酒爲家
海戍多歸鴈江城幾落花白頭弟兄在急難復何嗟

二
江南兵未息朝野共憂端戰伐疲吳稅功名老漢官
天空山霧慘地坼海濤寒妻子書難達華亭夢裏看

三
我惜吳門客言歸動是哀形容愁裏變離亂死中來
家遠身猶滯田荒賦幾催時清渡江去長嘯虎丘臺

湧金亭同冀定甫馬伯齡醉賦

百泉聲不斷風雨亂滄波地接煙嵐迥天開靈秀多
古人餘勝事今代有狂歌爲愛蘇門好携樽共一過

寓晁太史湖亭王樂三見過同酌

子猷吾舊好乘興過林扉席外滄波近歌邊白鳥歸
浦煙開霽色松日轉春輝學士呼新酒寧教幽事違
讀晁叔泰吉士墓碑廼父君石太史所製

青雲餘舊迹片石照佳城落日松楸處悲風父子情
文章多下淚存沒兩齊名無復同金馬招魂空月明
張叅政仲安進表還蜀九日過鄴失會賦此

贈別

北上千秋錄西歸萬里橋黃花空有約綠酒不同宵
樹擁秦雲斷山懸蜀棧遙艱難杜老在莫謾簡書招
鄆少叅還任閩中爽鄴下之約賦此寄懷兼

訊黃協恭

雲帆發潞河不復鄴城過地轉東南盡天連江海多
梅花傳越信春色起吳歌爲問乘驄使孤懷老澗阿

劉員外仲修督餉兩河言別

拂曙飛旌急君行有壯圖邊聲疲餽餉兵氣減樵蘇
醒眼非關楚憂心直在吳千帆風雨色張望渺江湖

樓居秋夜

短筇不到地老子愛樓居徒倚常科髮踈慵肯著書
窓高生月早簷迥接天虛萬戶燈明滅秋光澹自如
送陳僉憲子羽北伐

長郊停騎吹荒寺送君情春草初南下秋風又北征
軍容肅鴈塞劔氣壓龍城遙看燕山雨蒼茫一洗兵

寄懷許伯誠

發軔遼陽雪還家韋杜春客踈門自掩官罷酒相親
白首歌今代青山夢古人行藏不可問獨鶴下西秦

寄李員外秀夫

久別誰先老西風兩地心海天來朔鴈關月起秋砧
性懶交游少才高感慨深遙憐松桂色寂寞華山陰

卧病張肖甫在顧時奉使還蜀

蜀客來千里相看慰病顏心馳消息後義重死生間
飛夢通秦塞緘書度漢關登高不同賦秋色滿河山
枕上病懷贈陸道函兼謝在駕

卧病勞相問茫然意答遲科頭何氣色拊背獨心知
地濕霜凝草庭喧雀滿枝君看燕趙俗豪士豈長悲

酬姜侍御守約見寄

人生各有道人事豈相期天馬日能遠山雲春自遲

報章還獨感抗疏有深思吾老入松柏風煙北望時
寄贈馬別駕伯仁入京

白社幽期阻君今向紫宸當憂多事老轉餉一官貧
碣石天餘雪滹沱水自春月明時顧影猶憶舊綸巾
冬日寄高伯宗兼憶迺弟叔崇

君家郢城曲宦迹復燕中歲暮吟何苦陽春調不同
松明西署雪雀偃上林風有弟時相過開樽命楚童
人日感懷

新歲偏多感新詩不可無陰晴人日過江海客星孤
春興梅仍發鄉心鴈一呼酒杯堪自慰時復遣兒沽

寄懷鄭一陽山人

短筇隨處歇不待一壺懸身在浮雲世心遊明月天
豈忘棲洞日猶記種松年九轉何時見柴門生紫煙
集馬雲從園亭有感

江南疲賦稅江北重徵求誰復三齊念君應兩地憂
霜高殘樹色風急亂河流最感童謠處斜陽倚郡樓
送吳君搢登岱爲親祈壽

岱嶽初登眺秦松不可攀欲將千古色長比二親顏
心切雲相倚行遲鶴共還僊童授芝草靈秀到人間
秋夜竒上人禪房獨坐

久寄青蓮宇因之問上乘自知閒有味不愧老無能
響徹秋風樹寒生夜雨燈匡牀坐幽寂身似定中僧

過王州幕天叙間病

下車憐赤子况復歲華深對客春生面爲官月在心
郡齋秋草色城堞暮雲陰多病懷鄉國蕭然一楚吟

送吳君措歸新安二首

燕趙久爲客乘秋鳴櫂還獨吟霜月晚幾轉荻蘆灣
胡鴈驚心後江城屈指間竒峯三十六天際識黃山

二

故國多形勝青山擁萬重溪南歲暮雪石上古時松

留客呼新酒獻碁度暝鐘春來覓詩處誰繫野雲蹤
有懷

秋風起鄴城重我故園情林壑居難定漁樵計未成
野雲隨浪迹村酒脫浮名欲賦多憂思何如阮步兵

寄懷王子梁鎮鹿州

君乘舊驄馬西望渺黃河春色關中滿霜威塞上多
宦情逢羽檄世事起商歌獨夜耿無寐星光搖太阿

中秋無月

連宵雨太急仙桂失清芬四野明秋水孤城亂暮雲
陰晴何處定悲樂此時分不見山河影笙歌空自聞

周太叅子籲九日過鄴今晉四川廉憲漫述
別懷

遠託在知已江聲終古流君今皇甫輩吾豈左思儔
穉序為拙西蜀長驅馬中原數倚樓相逢不共醉忍負
菊花秋

四溟山人全集卷之六終

四溟山人全集卷之七

東郡 謝榛 著

東郡 蘇潢

全校

赤城 陳養才

東郡新安張季彥 詳校

五言律詩一百二十首

春日寄張郎中永錫

漠南春草長牧馬來胡王落月馳邊檄淒風起戰場
河山燕獨壯兵甲漢猶強正爾掄才日緘書報職方
懷李應乾潘時乘

別來思二妙望望各風煙山暗五丁路大各太守今擢四川憲副
湖明三泖天謫自編修今擢松江同知報書憑蜀使乘興待吳船
共對清秋月誰能不悵然

郁二少府席上醉賦

河朔驚相見曾聞說老夫氣猶燕俗在歌似楚狂無
共醉留官舍多愁向客途因君懷勝迹戎馬隔西湖

寄王蘇州二首時有倭寇之亂

岳牧今逾重憂端坐永宵歲侵疲郡邑時議到漁樵
雲暗青山路江喧白日潮傷心兵火後幾度望楓橋

二

欲定蒼生業還從舊俗看憂來寧在遠亂後益知難
理郡春雲動論兵海日寒吳中諸父老相見問加餐
武安除夕酌王抑之宅其子易從易知侍側
旅况乘時切年華隔夜新捧觴君二子彈劔我孤身
地得青山賦天留白髮人誰爲歲寒侶松老見龍鱗
送程子仁之楚

十日九彈缺留君竟此行鄉心急歲杪客計緩生平
雪暗梁園樹江空鄂渚城不聞王粲賦愁絕滯南荆

太原邑懷古

桐葉初封地槐花半落時計程何事迫驅馬故人期

晉水獨懷古唐風猶在茲回看仍借問野樹鳥空悲
寄崔岱屏都尉

望望三秋鴈誰傳上國書氣橫龍劍外天遠鳳簫餘
歲月身還健風雲計自踈瓊筵多勝事詞客復何如
何通政伯直遣使送予天津久闕奉謝詩以
見意

憶昔下燕州蒹葭潞水秋天風吹老鶴海日照孤舟
幾問長卿病深知平子愁無端望君處雲物滿西樓
關山月

皎皎長空月星河半有無光連玉關靜寒傍雪山孤

沙鴈時悽斷林猿夜嘯呼征人增百感把劍立平蕪
明妃詞

鳳闕虛歸夢龍城重遠愁黃沙連塞起黑水入荒流
淚盡琵琶夜魂消感築秋誰憐萬里外風雪滿貂裘
白鼻騮

年少耽遊俠長乘白鼻騮連翩金勒響婀娜玉鞭斜
紫陌嘶芳草青門踏落花鳴弓飛鳥墮巧捷萬人誇

春雪柬崔太史仲鳧

嘉靖丙申三月四日

片雪春深急同雲望裏賒凝寒滯燕子拂曙亂梨花
歌動王孫宴憂歸農父家詞臣應紀異北向一長嗟

春閨詞

楊柳正啼鶯
楊花飛滿城
春風天外去
落日海西明
逸氣搖金轡
豪華戀玉京
不知遊蕩子
曾念百年情

春夜觀妓

有美青樓子
嬌歌駐彩雲
月低桃葉扇
風動石榴裙
羅薦含春暖
華燈照夜分
重翻白苧調
幽怨不堪聞

晚過李子復餞別

攜樽同此夕
雲月有無間
曠達騷人意
淒涼遊子顏
亂蟲依草樹
孤鳥度河山
世路黃金盡
秋風一劍還

寄懷蘇廷珪先生

勾漏辭官早
丹砂不易成
門閒二水合
天遠一鴻輕
爲客幽期過
悲秋白髮生
菊花誰共采
風雨獨含情

登崑崙山

策杖何超忽
登登碧漢齊
俯看平野盡
獨立衆山低
風起斷猿下
日行飛鳥西
還招赤松子
共此白雲棲

西顧

木落太原秋
悲歌俠士流
邊關隨處險
戰守爲時謀
朔鴈下軍壘
胡笳鳴戍樓
唐虞舊都地
西顧使人憂

碧雲寺

羣山開寶地
策杖獨經過
石洞猶冰雪
巖泉更薜蘿

觀空塵慮盡垂老勝緣多安得支公侶相從老澗阿
自壽安山深入西谷赴廣泉寺不果

地勝無詞客秋光好亦閑人經幾曲水路入萬重山
野鳥渾相識雲蘿更一攀空懷遠公社日暮杖藜還
同朱道士通上人夜談因送予歸賦此

二高多道氣乘夜訪幽棲瑤草元無種青蓮不染泥
鶴閒丹鼎外月在法雲西相送還成笑分明過虎溪

正月六日集李時明館得知字

明日又人日陰晴那可期清樽聊一醉白髮幾相知
門巷雪仍在幽并春較遲漸看楊柳色鬱鬱亂鄉思

過王府尹汝立偶贈

曠達王京兆辭官歲幾徂教兒理文具對客話方壺
鑷白壯心在還丹氣不孤不知山館下曾復著潛夫
清明過王郎中學甫時園桃始花留酌

欲訪桃源去來看獨樹春無言當令節有色淨風塵
不取傾壺醉其如滿眼新仙郎能下榻華月復留人
章行人景南將發潞河追送值雨夜酌舟中
送送意不極悠然下薊門海天低雨色沙浦上潮痕
返擢期何處留君復此樽燈前待明發心曲坐相論

送唐儀部還瓊州

多病言歸去孤舟祇素琴海天南盡處燕關北來心
秋老下榕葉沙寒鳴翠禽賦成應有寄惆悵嶺雲深

送毛比部達和出守瑞州前任御史

帆飛秋水平候吏渡江迎風動褰帷處人傳抗疏名
楚雲時北度胡鴈復南征臨眺定相憶月高康樂城

浪遊

百歲形骸役吾生何浪遊寒蛩知靜夜老菊見高秋
海上白茅屋雲邊青石丘還從物外侶靈藥好相求

送張太僕熙伯視馬畿內二首

渥洼久寂寞群馬漫長鳴永罷將軍戰其如太僕情

黃沙深驛道白日靜關城望極風雲外乘秋壯此行

二

司馭巡畿甸飛旌指戍樓共傳天馬異寧復大宛求
月照昆吾冷風生首宿秋張衡有詞賦獨繫漢家憂

秋夜柬仲元仁

永夜愁欹枕天涯一病夫候蟲當砌亂秋月傍樓孤
采菊還三徑揚帆更五湖相將好歸去莫嘆歲華徂

李行人元樹宅同謝張二內翰話洞庭湖三

首

聞道洞庭勝南遊獨未能望中迷楚岫圖裏見巴陵

擢擬高秋泛樓期明月登何當吹玉笛聲度白雲層

二

詞客家何處西南是岳州地連湘樹闊湖共楚天浮
極目風煙夕驚心鴻鴈秋君山更竒絕應待子長遊

三

南望岳陽郡蒼茫吳楚分帆迴孤島樹樓出九江雲
落日浪中沒秋風天外聞何時采蘋藻湖上弔湘君

送朱邦憲還上海

送君不可住霜露滿幽襟醉後登樓賦天涯抱玉心
江門開曉色海樹帶秋陰歸去鶴亭上遙聽吳會吟

居庸關二首

遙遙度關塞策馬正西風驛路泉聲裏人家嵐氣中
霜餘澗草歇日上石林空多少長征客高秋感塞鴻

二

控海幽燕地彎弓豪俠兒秋山牧馬處朔塞用兵時
嶺斷雲飛迥關長鳥度遲當朝有魏尚復此駐旌旗
春夜過王侍御子梁宅時將按河南得韻二

首

烏棲官舍靜步履偶經過宿霧浮金闕春星動玉河
交情別後重逸氣醉來多好去梁園道因風寄薜蘿

送君向河嶽歸思渺難堪回首鴻初北當歌月正南
宮雲飄祖席御柳駐征驂去後聽黃鳥芳菲誰共探

春日

共道芳春好其如老病侵誰同一樽酒時醉百花陰
應接非吾事踈狂見客心因思故山侶悵望白雲深

送郭仰之歸吳門

踟躕向南浦惜別見相知雲盡鳥飛遠月明帆落遲
滄江遊子夢芳杜美人期一對闔門酒還應動遠思
送趙元哲下第歸東阿

父客山中夢孤懷月下歌青雲期賦就華髮感時過
龍劍閒星斗魚山靜薜蘿東歸訪黃石吾道欲如何
陳駕部錫卿來自錢塘舟次臨清適有汀州
之命貽書見懷用答五首

逸氣有元龍經春惜未逢書來帝城裏人隔海雲重
一別啼黃鳥相思度暝鐘鄞江秋到日誰共采芙蓉

二

海門春水發吳舫到何遲芳草行吟處孤鴻入望時
滄江成遠別白首見相知欲賦三山勝茫茫不可期

三

往年君別處梧葉正秋彫猶憶琴樽約曾同風雨宵
寒空鳴鴈急煙浦去帆遙猶有天南夢相隨度海潮

四

使君遙領郡相對復何年海樹曉行外江蘼秋思邊
城臨百越地帆盡七閩天見說春風早梅花可更傳

五

春酒不同醉春花空復開美人臨衛水客子滯燕臺
近得銅章報翻令錦纜回天知有黃霸早遣渡江來

雲山卷爲曹君題

青山多白雲中有陶徵君庭戶深不見嘯歌清可聞

蘿衣自沾濕松壑重氤氳不識從龍意長隨狝鶴群

端午集吳郎中峻伯宅得山字

令節方牢落招攜慰旅顏綵絲憶兒女蒲酒話鄉關
楚俗千年後燕歌一醉間坐看新月色猶自傍西山

五月六日集沈參軍子剛宅得微字

共餘采拾興幕府夜忘歸城月低瑤席天風到薜衣
坐深冰賦就興遠玉觴飛吾老多踈放江湖一少微

夏夜集孫員外文揆宅得天字

深夜移官燭清風敞客筵鐘沉漢苑樹月度薊門天
我愧謝莊賦人稱孫楚賢何當碧筒飲醉向北窻眠

夏夜集馮員外汝言舉子汝強宅賦得花字
淹留數高會伯仲復名家白髮幾年客紅蕖三度花
風從仙苑至月傍帝城斜徙倚發孤詠隔林啼曙鴉
送趙少尹文甫之華陰

燕市離歌動殊非故國聞清樽聊共我黃髮更憐君
縣隱潼關樹堂流華嶽雲不知松月下誰與坐宵分
送冀定甫宰唐山

蘇門君久別燕市此相逢復送郎官去遙看雲樹重
孤城猶漢俗百里卽堯封月下應懷侶青山度遠鐘
夜雪道中懷友

塞門北欲盡行路黯傷神聚散風前雪高寒馬上人
沙明疑不夜樹縞信如春尚憶梁園侶杯傾臘味新

詠雪

空闊明狐塞微茫淨鷺灘關山望處別杖屨步時難
風掃無全白冰連更積寒菟園成謝賦併得早梅看
東關寺送別王希元

背郭文殊寺蕭條門晝關偶因諸客過共羨獨僧閒
松老雲相合簷空雀自還浮生各有繫誰苦易顏顏
夜坐

兵氣動嚴關纔聞虜騎還邊愁醒醉裏身事去留間

亂響更深拆空明雪後山苦吟時倚杖不使客心閒
東橋爲胡太僕賦

西來倚杖處下有白鷗群偶爾乘秋興翻然向夕燻
溪光自清徹野色兩平分不定中流影相知有片雲
將登五臺夜宿圭峰禪房

驅車林壑晚不覺路縈迴鐘響禪扉近僧迎山火來
登攀惟一徑開闢自多臺上有古松柏當年誰爲栽
圭峰曉望

圭峰冠形勝幽事且禪林石閣參雲興山橋俯澗心
萬松皆古色孤磬自清音更覓最竒處寧辭冰雪深

山行有感

地僻逢人少同行自有羣幾多山脊雪一片馬頭雲
古木參天出寒鴉薄暮聞可憐春草發誰爲採幽芬

偶成

鄉園尚隔越寒暑又經過晚計身無補新交事轉多
聞時自天地靜處卽煙蘿白鳥忽飛去悠然一浩歌
雪

寒色迷荒野炊煙識遠村有山皆變幻無處不飛翻
烏雀偏依樹樵蘇懶出門征人欲凍死酒價未須論
登山北望憶大司馬江公伯陽

夜宿廣武寨朝登廣武山時清多壯士地險更嚴關
節鉞巡行處風煙指顧間知君重麟閣易使鬢成斑
留贈畢守備

廣武屯兵甲君今可壯圖得心能戰守報國在艱虞
城曉角聲斷沙晴鷗影孤秋來一躍馬仗劍指伊吾
崔千兵見過走筆賦贈

白晝鴈門肅材官今見君雕弓半月影寶劍七星文
班馬依山草孤鷗出塞雲憑高殊激烈笳鼓夜來聞
留別陳大參粹中二首

征驂聞早發客自塞門歸天與烏棲樹城寒雪擁扉

美人仍兩地春夢不相違獨賦關山月茫茫共素輝

二

別後緘書少天驕數往還正憂烽火急翻羨草茅閒
積雪猶平澗殘陽半在山相逢春尚淺楊柳未堪攀

留別正莊主人二首

高樓非故國臨眺旅愁生風雨三秋過山川幾賦成
王孫別後路芳草望中情何處偏相憶霜空鴈一聲

二

久客復何事樓居長自吟雲山遠近色海鶴去留心
後會嗟華髮中懷託素琴應憐枚馬在梁苑草葉深

寄太和山何隱君二首

棄官依白嶽歲月此棲遲
道侶頻相過丹經久自知
心閒虎嘯處步緩鶴隨時
倚杖看晴色前峰又采芝

二

太乙壇前客桃花十度紅
幽棲片石定元氣四時通
古樹鄰蒼壑閒雲澹碧空
能談非靜者真意幾人同

雨後立夏

園中綠已暗寂寞問花神
興託清樽酒愁欺白髮人
山城初過雨天地尚餘春
又與東風別堪嗟羈旅身

汾村詩

村居在何許汾上有柴扉
每約詞人過寧教幽事違
林巒澹遠色鷄犬靜斜暉
秋水濯纓罷心閒雲自飛

送薛逸人歸荆南

河汾春色過此別路三千
旅夢關山月鄉心風雨天
馬歸湘竹外城對楚江邊
去住何須嘆荆王自下賢

寄徐水部有和

粉署當形勝虛懷誰似君
樹涼沙市雨江白渚宮雲
鸛鶴翩翩下帆檣歷歷分
楚童能艷曲不使水曹聞

賞芍藥

吾家賦紅藥此地白花多
色自輝庭砌香偏着綺羅

還期月同賞莫負夜相過祗恐饒風雨芳心復幾何
孔宅賞榴花得清字

西域來茲種先從漢苑榮
燃枝有定焰壓葉更垂明
能奪珊瑚色偏含造物情
夜深窺不見風露暗中清
賦得老驥伏櫪

憶昔追風去寧辭千里賒
關山猶識路首宿幾開花
能復燕昭重還令伯樂
嗟長嘶心自遠雲物渺天涯
宋大叅伯鎮見過午睡失欵賦此以謝

無管身益懶科髮小窻眠
白日羲皇世青山太古天
不期車馬過徒使旆旌還
此意君知否清風爲一傳

北園同孔老賦得風字

悠然雲在空此意許誰同
身出勲名外心歸恬澹中
高樓偏夕照深竹自涼風
試問今秋興還添菊幾叢
初伏孔宅招飲坐有五客

老病汾陽客妻孥鄴下居
聊成七子會又見一庚初
雨歇清深院苔沿綠廣除
秋來下梧葉風景重愁三
夜雨

夜來殊不寐百感古今情
道在楚騷重年衰燕俠輕
軒庭回爽氣風雨失殘更
多少人欹枕中心別有營
宋伯鎮招飲署中賦得長字

綠草夾階長憑軒共晚涼
烏聲投暝樹霞影蘸清觴
興劇三秋賦年衰幾日狂
今宵話離合風露滿衣裳
雨後早起

積雨空階滿開軒幽興深
半窗低曉月幾處苦秋陰
已倦人間路能閒詩外心
還憎多此癖習靜老山林
中秋宿來遠店無月懷孔老

雨隔團圓夜天違浩渺秋
關山增客感烏鵲向人愁
堠館誰同賦匡牀此獨留
知君待華月秉燭在高樓
秋雨宿權店驛有感

驛燈分暝色野館滯秋陰
已倦衰年事偏馳故國心
夜涼槐雨滴月暗草蟲吟
歸夢不知路千山雲更深
積雨感懷

十月天多雨霏霏日夜寒
西山改氣色北斗失闕干
生計門常掩悲歌燈又殘
可憐黃菊老幾向病中看
初冬十五夜雲洲丈招遊東林得僧字

皎皎東林月初看法鏡升
殿沉中夜磬松隱上方燈
興劇催銀竿詩成轉玉繩
地非廬霍勝天許著名僧
送兒元輝歸鄴

汝父老多病汝兒嬌更癡
中懷行路日西望到家時
山晚雲連色松寒雪偃枝
計疎淹客邸應報故人知

李園暮雪同鎮康安慶二王偶成

帶雪幾歸鳥蕭然集舊柯樹明春意早庭敞暮寒多
綠醕同梁苑清才並郢歌還期看山色天外玉差峩
寄鄴中李德佩二首

茫茫一人海自古混魚龍氣勁寫愁賦春醕垂老容
池邊月明鶴嶺上歲寒松吟嘯誰爲侶差予萍水蹤
西園帝子去亭榭草萊深登眺同懷古悲歌獨至今
山高不隔夢月皎更知心鄴樹鳴春鳥因風得好音
冬夜昭覺禪院示萬燈上人

舊衲燈前補天寒霜滿庭不眠中夜偈早起半函經
慧力刻諸障禪心通百靈臘同祇樹老春雨又青青
寄張許東少卿

邊庭疲戰伐犒士有黃金 帝里丹砂貴仙壇紫氣
深瞻依三殿步諷諫 兩朝心近喜趨班早猶能馬
上吟

寄郃文川寺丞

羨爾乘驄使西南振嶽年楚靈清見日漢水靜浮煙
秩進承殊渥官閒得早眠猶思草疏夜心事對青天
上黨感懷寄玉泉山劉隱君六首

暮雲太慘澹何處吸丹霞樹暝山川隔窻鳴風雨斜
驅愁恐助病說夢轉思家處困無凶吉殘燈尚結花

二

萬事寧無意千金不解顏海濤來往際蜃氣有無間
自信安時拙誰能到老閒長披太古畫天外幾青山

三

鳳鳴消息遠聲徹世人知燕谷霜何早吳江春自遲
異同千古俗沉鬱百年思角里幽棲處天教生紫芝

四

道氣偶相合論交無淺深周旋當日事去住老年心

露下菊花圃秋高楓樹林蒼山不改色萬古一知音

五

大德寧無報微忠亦可憐澗清不隱石松直若參天
多病迎秋氣長歌壯暮年西風歸路險走馬太行顛

六

閱世乃如此無言寥落中棘花垂暮雨蕙草向西風
客况寒暄別人心變化同沉吟誰會意寄語鹿皮翁

寄李蒲溪侍御時巡兩淮

乘驄出帝里南向路漫漫白日江城肅清霜淮水
寒寸心懸國步幾疏達朝端况值多邊警行臺正

北看

寄蕭懷竹中翰

宦遊越東彥駐馬訪綸巾燕趙相違久星霜一念真
雲藏禹穴古花發鏡湖春憶昔談形勝中懷浣俗塵
寄懷顧近湖北部

莫測文園志龍光薄海天遙知變化日稀見老成年
客路西淹晉神州北壯燕白雲樓上賦秋色滿高
筵

寄懷李洞霞中翰

憶昔會京華藏真識洞霞中朝且鶴鷺大澤任龍

蛇共醉侯門酒相尋帝里花君應惜老病猶自客
天涯

寄左鑑菴計部

坐理臨官署回瞻卽帝京千帆落暝色一水送寒
聲自古邊儲重何時國稅輕關河正冰雪感慨獨含
情

憶舊主人林叟

層樓出燕市客寓半琴孤月白人同異天寒酒有無
幾年淹杖屨千里夢江湖嘆息向平老時披五嶽圖
憶都門酒家王四

尚憶高樓飲青帘出綠楊頻賒寧沮興浩唱不嗔狂
謝客惟深醉胡姬自盛妝幾回清夢裏聽雨滴糟牀
寄贈宋前塘監丞

伯仲寧徒老行藏各見真鄉書惟驛騎宦迹且京塵
巷僻槐相合庭閒雀自馴梅花正含雪先覩上林春
寄懷蕭竹齋鴻臚卿

鴻臚三十載幾度點朝班秩進年垂老恩加日轉閒
海圖天際鶴水墨雨中山出入多詩興園亭松可攀
九日寄懷田夢鶴兵憲

別後幾重陽停雲渺帝鄉登高同節序垂老各行

霜藏夕鳥安庭樹秋光照野塘何時問幽寂歲杪正冰

寄劉紫山侍御時巡江右

已復滇南命巡遊見爾功當朝正簪筆何處又乘驄
楚甸春光裏江城霜氣中遺祠弔徐穉應憶野人風
寄王生童岡

鄴館君相別遙傳山右書古人排患難俠氣任親疎
日下今王澤燕中舊客居雕胡在家飯應憶鏡湖魚
寄戴楚望錦衣兼傷王春塘太守

思君折柬夜花月醉高堂玉潤才兼美冰清祿自長

老懷關聚散勝事感存亡不見乘龍客松楸空夕陽
寄史鶴峯方伯

憶昔河洲別揚帆北去情秋深鄴下路雲渺范陽城
雷雨龍千變林臯鶴一聲吟詩老何益山嶽仰勲名
憶楊賓吾員外

知已爲郎去關河十度春寸心懷自切一面夢猶真
巷轉通華省門開見紫宸應憐宰邑後賦稅幾家貧

四溟山人全集卷之七 終

程